

Date – 19/04/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Vawiin tlai dar 5 atang khan Thawhlelni zing dar 7 atanga vote thlak tan tur Aizawl Municipal Corporation (AMC) inthlan atana vote zawn hun khar a ni.
2. AMC huam chhung Ward 19-a Corporator thlanna naktip Thawhlelni a vote thlak tur atana inbuatsaihna,peih fel a ni tawh.
3. Mizoram Universal Health Care Scheme(MUHCS 2.0)-a inziah luh theih hun pawhsei a nih hma April ni 15 thleng khan mi 31,671 an inziaklut tawh.
4. Manipur-ah helho nia rin-ten nimina Imphal leh Ukhrul inkar National Highway 202-a lirthei tlan lai an lambunna-ah civil mi 2 an thi.



SILENT PERIOD

Vawiin tlai dar 5 atang khan Thawhlelni zing dar 7 atanga vote thlak tan tur Aizawl Municipal Corporation (AMC) inthlan atana vote zawn hun chu khar a ni.

State Election Commission chuan inthlan campaign phal loh hun ‘Silent Period ‘ puangin hei hian vawiin tlai dar 5 atanga vote thlak zawh hun April ni 21 tlai dar 5 thleng a huam ang. Hemi chungchang a sawifiahna-ah State Election Commissioner Dr H. Lalthlangliana chuan, Vote thlaktuten tuma chim buai lova zalen taka rilru an hman theih nan Silent Period hi puan a nih thu sawiin, Political Party te tan hun rei tak campaignna hun hawn ani tawh a, vote thlak dawn hnaite hi chu Voter te chan pual, an duhthlanna felfai an siam theihna atana inbuatsaih hun anih avangin Voter te chanvo liau liau a ni a ti a. He hun hi ti buaia campaign tum talh chu dan bawhchhiatna a nih bakah Voter-te zah lohna a ni a ti. Voter-te pawhin anmahni hmin tuma la campaign ru fo te chu Voter te zahlohna, anmahni ngaineptu an ni tih hrethiama an lo dawnsawn loh thiam a ngaitih sawiin,Political Party zawng zawng te chu Silent Period ngai pawimawha voter chanvo zahthiam turin a ngen a ni.

SEC thuchhuah tarlan danin Silent Period chhung hian Political Campaign-na ang chi vantlang inkhawmte, vote zawng tura mi ina luhte, Campaign lam hawi thuziak te, Printed leh Electronic Media hmanga vote tura insawmna ang chite leh mipui ngaihndan lakte khap a ni.

He tih lai hian political party hrang hrangte chuan inthlan campaign beihpui thlak hi an khar tawh a. Zirtawpni khan Mizoram Pradesh Congress Committee (MPCC) chuan Vanapa Hall kawtah an president Pu Lal Thanzara'n a khar a. Nimin khan MNF chuan ward tinah campaign hi kharin rorellai ZPM party chuan nimin tlai khan an party hruaitu Chief Minister Pu Lalduhoma hovin an khar a ni. AMC inthlan lo awm turah hian rorel lai ZPM, bakah MNF leh MPCC te chuan bial/ward 19 an chuh kim vek a. BJP-in bial 11-ah candidate an nei a. Independent candidate an awm lo. AMC bial/ward 19 zinga 6 chu hmeichhe tan chauha chuh theih tura ruat ni mah se, tu pawhin a chuh theih bialah hmeichhe candidate 7 an awm a, ZPM leh MPCC hmeichhe candidate 3-te'n tu pawhina chuh theih bial an chuh a, MNF hmeichhe candidate pakhatin a chuh bawk. Tun tum AMC inthlan chuhtu mi 68 zinga 28 schu hmeichhia niin, INC leh ZPM-ah hmeichhe candidate 9 ve ve, MNF-ah 7 leh BJP-ah 3 an awm a ni.



CIVIC POLLS

Aizawl Municipal Corporation huam chhung Ward 19-a Corporator inthlanna naktip Thawhlejni a vote thlak tur atana inbuatsaihna engkim peih fel a ni tawh.

State Election Commissioner Dr. H. Lalthlangliana'n a sawi danin Polling Party zawng zawngte naktuk Thawhtanno zingah an duty na hmun pan turin an inruahhman fel vek tawh a, hemi hma lam hian kum upa leh damlo chaklo zual vote thlakna hmun pan thei lote tana a hmuna pan chilha vote thlakna (Home Voting) ruahhmanah vote 2,594 a tla tawh a, election duty puala vote thlakna siamah vote 1,328 thlak lo ni tawh bawk a ni. Thawhlejni hian zing dar 7 atanga tlai lam dar 5 thleng vote thlak hun hawn a ni dawn a, ward 19 a polling station 257-ah electronic voting machine (EVM) hmanga vote thlak a ni dawn a ni.

AMC inthlan neih turah hian vote nei hmeichhia nuai 1, sing 2, sang 9 leh 656 leh mipa nuai 1, sing 1 leh 333 an ni a, an vaiin vote nei hi mi nuai 2, sing 3, sang 9 leh 989 an awm a, mipa aia hmeichhia an tamna chu 19,323 a ni. Vote awm tamna ber chu ward 18-na niin, vote 18,906 an awm a. A tlemna ber ward 8-na-ah vote nei mi 7,975 an awm thung ani. AMC huam chhungah hian veng bil ang a vote tamna ber chu ward number 2-na huam chhunga Bawngkawn Veng a ni a, vote 6,442 a awm a ni.

Dr. H. Lalthlangliana chuan tun thlengin MCC bawhchhiat avanga hrem ngai an la awm lo tih sawiin, Sorkar Department 2, MCC bawhchhia te chu insawifiah tirin an thil tih suddir ani, ati a, MCC bawhchhia a puh Minister 3, MP 1, MLA 1 leh Candidate 1 te chu complaint theluttute'n finfiahna tha tawk an pek theih loh avangin thiam chan tir an ni a. MCC Exemption diltu 50 zingah dilna 37 chu phal sak an ni ati bawk.



CM ON AR VACATED LAND

Chief Minister Pu Lalduhoma'n Assam Rifles hmun chhuahsan hman dan tur ngaihtuatu, advisory committee-a tel environment venhimna lama inhmang ten an rel dan anga kawngpui zauh na atana thingkung kih a nih hnua an sawisel leh si chu committee ah tel zel tlak an ni em tih ngaihtuah a awl hle a ti.

Nimina Aizawl Vanapa Hall kawta Street Campaign kharna hun an hmanah he thu hi sawiin, Chief Minister chuan Assam Rifles chhuahsan Lammual singsak mek hman dan tur chu ZPM Party leh a kaihhruai sorkar ngaihtuah ni lovin Mizoram mipui zawng zawng aiawh zo- NGO zawng zawng leh party zawng zawng bakah kohhran aiawh te thukhawmin an rel tlan a ni ati a, abik takin environment venhimna lama inhmang pawl te phe chu an vaiin an tel tir an nih thu sawiin, chuta an thutlukna ang chuan an kalpui mai a ni tih sawiin, a relnaa tel ve ngei ten an sawisel leh chu hriatthiam har a tih thu sawiin, he committee ah hian tel zel tlak an ni em tih ngaihtuah a awl hle a ti a. Kawngpui sial tura Assam Rifles hmun chhuahsan a thingkung kih chungchangah sorkar chu mawhpoh ber ni mah se, advisory committee pumpui mawhpurhna a ni zawk tih sawiin, kawngpui zauh nan thingkung chu kih loh theih loh a ni a, hetihlai hian zuah theih ang ang chu zuah ngei ngei tur in thutlukna an siam a, kih loh theih loh te pawh a zung an kar a, Aizawl sumtualah an phun leh dawn tih a sawi a ni.

ZPM Party Media Chairman Pu B. Lalchhanzova, Minister pawhin nimina Aizawl Press Club-a chanchinbumite an kawmnaah tunhnaia Assam Rifles chhuahsan rama thingkih chungchang chu sawi chhuakin, Assam Rifles te Zokhawsanga an insawn chhuah hnua Lammual enkawl zui dan tur duangtu tur Advisory Committee chu nikum 2025 April ni 28 khan Chief Minister kaihhruaina hnuaia kalpui turin din a ni a ti a. He committee ah hian Official te bakah NGO leh political party pawl 14 te telh niin, Lammual hman zui dan tur relnaah hian ZPM chuan party mal angin inrawlhna a nei lo a ti a, committee thurel ang zelin an kal a, Lammual chhehvel kawng laih zauh kalpuina kawngah thing suat vak emaw, Lammual hmunhma tih chereu vek emaw chu an tum a ni lova, Mizoram tana tha ber tur, Aizawl khawpui tana tha ber tur ngaihtuah chungin hma an la thingkih chungchang lo ri ta hluai pawh hi chinfel chhoh theih ngei an inbeisei thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MUHCS

Mizoram Universal Health Care Scheme(MUHCS 2.0)-a inziah luh theih hun pawhsei a nih hma April ni 15 thleng khan mi 31,671 an inziaklut tawh.

Mizoram State Health Care Society (MSHCS) Chief Executive Officer (CEO) Dr Lalhriatzuali Ralte hnen atanga Akashvani News Aizawl thudawn danin, kumin February ni 16 atanga tun thla April ni 15 tlai dar 3 thleng khan MUHCS 2.0 hnuaiah hian online leh offline kaltlangin mi mi 31,671 an inziaklut tawh a. Chung zinga mi 31,333 te chu online kaltlanga inziaklut niin, mi 338 te chu offline a inziaklut te an ni. Dr Lalhriatzuali Ralte chuan mipuite chu MUHCS a inziah luh hun tawp ni May ni 15 chu bawhpelh lo turin a chah a, hemi hnu hi chuan la inziaklote tan grace period an hawng tawh dawn lo tih a sawi a ni.



MANIPUR AMBUSH

Manipur-ah helho nia rin-ten nimina Imphal leh Ukhrul inkar National Highway 202-a lirthei tlan lai an lambunna-ah civil mi 2 an thi. Police sawi danin, inlambunna hi TM Kasom khaw bula chawhnu dar 1.30 vela thleng a ni a, Imphal atanga Ukhrul pan tur lirthei 10 chuang an tlan laiin kawngpui sir tlang pawng atangin helho hian an lo kap a ni.

Ukhrul Dist-a Litan chhehvelah tunhnai atang khan Kuki leh Tangkhul Naga-te an inkap deuh reng a, National Highway 202 pawh hi silai kengten an dang ping fo thin a ni.

